

DOMENIE XI «VIE PAL AN»

Jutoris pe Liturgjie

Domenie, ai 17 di Jugn dal 2018

Lis leturis di vuê a son bielis e significativis, e a consolin tal leilis a prin colp, ma a ponin ancje des domandis. Par esempi: cemut mai che il ream di Diu al bute dibessôl intant che tu tu durmîs, se cun ducj i sfuarçs dai predis la int in glesie e cale simpri di plui? Il ream di Diu al è come un grignel di senape: al cres e al devente plui grant... Tai fats a nô nus semee che vuê a cressin tristerie e division e a calin bontât e union.

Ma il vanzeli nol pues sbalgjiâ, e duncje al è alc tal nestri mût di vivi la religjon che nol cuadre, che nus impedîs di viodi la plantute a cressi. Che a sedin tradizions di glesie ormai cence sens, l'aiar incuinât che o respirin, il rît de messe standardizât e stufadiç, il cambiament di epoche, une superficialitât simpri plui superficial, il pôc amôr a la nestre comunitât cristiane... Un fat al è sigûr: nus restin mistereosis lis peraulis dal Signôr: il ream di Diu al bute...al cres... Dulà?

O podìn ben dî cu la antifone di jentrade:

Antifone di jentrade

Cf. Sal 26,7.9

Scolte, Signôr, la vôs dal gno berli.

Tu sês tu il gno jutori:

no sta parâmi vie,

no sta bandonâmi, Diu de mê salvece.

Colete

Diu, fuarce di chei che in te a sperin,

scolte ben disponût lis nestris preieris,

e, stant che cence di te la debolece dai oms no pues propit nuie,

danus simpri il jutori de tô grazie

par ch'o metin in vore i tiei comandaments

e ti plasìn tes intenzions e tes oparis.

Pal nestri Signôr Gjesù Crist to Fi, ch'al è Diu

e cun te al vîf e al regne dutune cul Spirtu Sant,

par ducj i secui dai secui.

PRIME LETURE

Ez 17,22-24

O ai alçât l'arbul bas.

I studiâts a disin che cheste lezion si riferîs al esili in Babilonie (secul VI p.d.C.), li che tune tiere lontane i esiliâts si devin dongje cui lôr anzians, predis e profetis e ju tignive sù la sperance di une future liberazion midiant di un dissident - il ramaçut di cedri - dal re David. Un sium, une imprese impussibile che al podarà fâle dome il Signôr. Di fat ducj i arbui de campagne a ricognossaran che jo, il Signôr, o ai sbassât l'arbul alt e alçât chel bas. Nô o sin usâts a cjalâ l'arbul alt, a dipendi dai parons dal mont intant che il Signôr al opere e al puarte inedant il so ream di civiltât midiant de pontute di un ramaçut. Miracui dal Signôr.

Dal libri dal profete Ezechiel

Il Signôr, gno Diu, al dîs cussî:

«O cjolarai dal ramaçut di cedri

dome la sô ponte,

i distacarai dome une pontute

e le plantarai jo

suntune mont alte e boschive.

O vueil plantâle

su la mont alte di Israel

e e slargjarà i ramaçs e e frutularà

e e deventarà un cedri ben foltît.

A laran a sotetâsi ducj i ucei

e dut ce ch'al svolè al larà a racreâsi te ombrene des sôs fueis.

Ducj i arbui de campagne a ricognossaran

che jo, il Signôr,

o ai sbassât l'arbul alt

e alçât chel bas,

o ai fat secjâ il len vert

e menâ chel sec.

Jo, il Signôr, o ai dit cussì e cussì o fasarai».

Peraule di Diu.

SALM RESPONSORIÂL

dal Salm 91

Il ritornel al è induvinât parcè che dut al comence de perauale di Diu. Di fat, la semence e je la perauale di Diu (Lc 8, 11) semenade tai nestris cûrs. Chê perauale e rint il fedêl, il just dai timps di une volte e di vuê come palmis, come cedris che però a florissin tai andits dal nestri Diu. E il salm al vise: A butaran parfin te lôr vecjæ, a restaran frescs e vivarôs, come che la vite dai sants, ancje di paîs, nus insegne.

R. Fâs cressi in nô, Signôr, la semence de tô perauale.

Se cjantat: Il cjant dai salms responsoriâi, p. 148.

Al è biel laudâ il Signôr,

fâ une cjante al to non, Altissim,

contant il to boncûr a buinore

e la tô fedeltât gnotvie. **R.**

I juscj a florissin come palmis,

a vegnin sù come i cedris dal Liban;

riplantâts te cjase dal Signôr,

a florissin tai andits dal nestri Diu. **R.**

A butaran parfin te lôr vecjæ,

a restaran frescs e vivarôs,

par contâ che il Signôr al è just, la mê crete,

e che in lui no 'nd è ombre di injustizie. **R.**

SECONDE LETURE

2 Cor 5,6-10

Le metin dute, sedi ch'o vivin tal cuarp sedi che nus tocji di saltânt fûr, par plasêi al Signôr.

Une confidence di S.Pauli. L'apuestul nus vierç il so cûr e nus palese dut l'amôr che lui al à pal Signôr; amôr che lu compagnarà in vite e in muart. Ce che al è impuartant te vite di ognidun di nô al è metile dute - le metin dute par plasêi a lui,- par plasêi al Signôr.

De seconde letare di san Pauli apuestul ai Corints

Fradis, o sin simpri plens di coragjo, e savint che fin ch'o sin tal cuarp o sin esiliâts lontans dal

Signôr, parcè che o lin indenant te fede e no ancjemò te vision, o sin plens di fiducie e o preferin lâ

in esili dal cuarp e vivi dongje dal Signôr. Par chel le metin dute, sedi ch'o vivin tal cuarp sedi che

nus tocji di saltânt fûr, par plasêi a lui. Di fat ducj o vin di presentâsi denant dal tribunâl di Crist, par cjapâ ognidun la ricompense des oparis fatis cul cuarp, tant in ben che in mâl.
Peraule di Diu.

CJANT AL VANZELI

cf. Ats 16,14

R. Aleluia, aleluia.

Vierzinus, Signôr, il nestri cûr
e o rivarìn a capî lis peraulis di to Fi.

R. Aleluia.

VANZELI

Mc 4,26-34

Al è il plui minût di dutis lis semencis, ma al devente plui grant di dutis lis jerbis.

Lis dôs parabolis a son claris: se la semence e je buine, ancje se pitinine, e mene pome. Bisugne però sancirâsi che e je une semence di peraule dal Signôr e no dome fate di abitudinis, di tradizions, di resonaments umans o di devozions nostranis.

Dulà cjatâ il ream di Diu? Li che al è il Spirt di Gjesù. E li il Spirt di Gjesù al bute amôr, gjonde, pâs, pazience, bontât, boncûr, fiducie, biel trat, paronance di sé. Poben, chei che a son di Crist Gjesù (Ga 5, 22. 24) a san li che al è, dulà che al cres e cemût che al bute fûr e al cjape pît il ream di Diu.

Dal vanzeli seont Marc

In chê volte, Gjesù al diseve a la int: «Il ream di Diu al è propit cussì: come un om ch'al à butade la semence tal teren, e po al duâr e al vegle, di dì e di gnot, intant che la semence e bute fûr e e cjape pît cence che nancje lui nol sepi cemût. Il teren al bute dibessôl prime jerbe, po spi e po tal spi il forment sglonf. Cuant che po il prodot al è madûr, si spessee a meti man a la sesule parcè che e je rivade l'ore di seselâ».

Ur diseve ancje: «A ce podino meti a pâr il ream di Diu? O ben: cun ce paragon podino figurâlu? Al è come un grignel di senape che, cuant che al ven semenât tal teren, al è il plui minût di dutis lis semencis ch'a son su la tiere; ma, une volte semenât, al cres e al devente plui grant di dutis lis jerbis e al bute fûr ramaçs tant grancj che i ucei dal cîl a puedin lâ a parâsi sot de sô ombrene».

Cun tantis parabolis come chestis ur predicjave la peraule, seont ch'a jerin in stât di capîle, e cence parabolis no ur fevelave; ma dopo, ai siei dissepui, ur sclarive dut a part.

Peraule dal Signôr.

Su lis ufiertis

Diu, che cun chescj regâi dal pan e dal vin
tu nudrissis la gjernazie umane
e tal sacrament tu le fasis tornâ gnove,
fâs, par plasê, che no nus mancji
chest sostentament dal cuarp e da l'anime.
Par Crist nestri Signôr.

Antifone a la comunion

Sal 26,4

Une robe i domandi al Signôr e dome cheste o brami:
di stâ te cjase dal Signôr ducj i dîs de mê vite.

O ben:

Zn 17,11

Al dîs il Signôr: Pari sant, tenju cont tal to bonvolê
chei che tu mi âs dât, par ch'a sedin un come nô.

Daspò de comunion

Cheste sante comunion ch'o vin ricevude, Signôr,
come ch'e je spieli de unitât dai fedêi cun te,
cussì e rivi a dâ dongje inte unitât la tô Glesie.
Par Crist nestri Signôr.

* * *

Riflession di pre Antoni Beline: **La semence e cres dibessole**

Il vanzeli, par chel che al à ancje dome un pêl di pratiche, al è fodrât di parabolis, di paragons, di spiêi. O pensi par dôs reons: prin di dut parcè che il paragon al jude a capî. La seconde reson e je che si trate di robis tant grandis e tant altis che no si pò dânt une definizion ni une misure precise. Dome cuntun paragon, tirât fûr de vite di ogni dì, si pò vê une idee, un rimpin di ce che, altrimentri, no si pò nancje discori. Un alc al è dome alc...

Vanseli par un popul, an B, p. 123.

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Gjesù al disè:

***Mi soi sbassât e mi soi fat pitinin;
cussì, midiant dal gno nuie,
o ai podût menâus in alt
di dulà che o jeris colâts.
Jo us quartarai su lis mês spalîs.***

Antîc codiç gnostic

* * *

Vinars 22 : S. Nicete vescul **Memorie**

Daspò che Atile, dal 452, al veve fiscade Aquilee, il vescul Nicete al doprà dutis lis sôs fuarcis par tirâ sù lis sôs pioris spaventadis e par medeâ lis feridis de sô Glesie. E je rivade fint a nô une letare là che il pape Leon I, scrivint a Nicete e midiant di lui ai vescui de sô provincie, al mostre la strade plui adate par riparâ i mâi morâi che l'incursion dai Uns e à fat in dute la provincie. Nicete al murì viers il 485, lassant il ricuart di un pastôr sapient e bon.

***Pastôr sapient e bon,
te comunion fra vîfs e muarts,
done ancje a nô sapience e bontât
in cheste glesie di vuê.
Amen.***

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*

- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*